



24. aggusti 2018

UKA 2018/136

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Meeqquerivinni pikkorissunik sulisoqalernissaq anguniarlugu qanoq iliorluta perorsaasutut ilinniarnep sulinissallu pilerinarnerulernissaa pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Nivi Olsen, Demokraatit)

Demokraatinut pingaaruteqarluinnarpoq angajoqqaanngorlaat qitornaminnik meeraaqqerivinnut toqqissimallutik tunniussisarsinnaanissaa erninerminnut atatillugu sulinnigiffeqareerlutik suliartoqqittussanngoraangamik.

Tamanna tunngavigalugu qinigaaffiup siuliani siunnersuutigaarput qanoq iliorluni utaqqisut allattorsimaffianiittut ikilisarneqarsinnaanersut. Siunnersuutip kingunerisaanik Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat nr. 16, 3. december 2012-meersoq naapertorlugu angajoqqaat perorsaanikkut inerikkiartuutaasunik sunik pisariaqartitsinersut pillugu Naalackersuisut peqquneqarput misissuequllugit. Misissuinermi paaseqqissaarusunnerpoq 1) illoqarfinni/nunaqarfinni pisariaqartitat ilaatillugit aamma ilaatinngit neqeroorutit atuutereersut aamma 2) kommunit suliassaat paaqqinninnissamut neqeroorutitut atorneqanngitsunut tunngatillugu. Misissuineq ajoraluartumik naammassineqanngilaq upernaakkut qinersisoqartussanngornera pissutigalugu.¹

Tamatuma saniatigut Demokraatit kommunini siunnersuuteqarput utaqqisarnerup sivikillissarnissaa pillugu.²

Kisianni utaqqisarneq pillugu qanorluunniit pisoqaraluarpat inuiaqatigiittut pinngitsoorsinnaanngilarput meeqqanik tigussisussanik sulisoqarnissarput. Allatut oqaatigalugu qissimittariaqarparput meeqqanik paarsinnaasunik perorsaasunik ilinniartitsinissaq sulisoqarnissarlu qanoq iliorluta pilerinarnerulersissinnaaneripput. Malunnarporli tamanna suliassaasoq imaannaanngitsaq.

Perorsaanermut Ilinniarfik Ilulissaniittoq ukiumut perorsaasunik 20-nik ilinniartitsisarpoq. Aprilip aallaqqaataa 2018 aallarnefigalugu taakku naammassigunik tapit ilanngunnagit

¹ https://ina.gl/dvd/EM2016/pdf/media/2527389/pkt55_em2015_bf33_daginstitutionspladser_bet_2beh_da.pdf

² <https://sersersooq.gl/uploads/2018/02/20180220-Kommunalbestyrelsenssjetteordin%C3%A6rem%C3%B8de-Copy-1.pdf> (side 31-32)



akissarsisassapput qaammammut 20.342,98 koruuninik.³

Septemberimi 2017-mi paasineqarpoq Kommuneqarfik Sermersuuginnarmi perorsaasut atorfi 50-t inuttassaqaangitsut (104-raasunit 52-t).⁴

Perorsaasunik amingaateqarneq allatut oqaatigalugu inuiaqatigiinni ajornartorsiutaavoq piviusoq allatut ajornartumik aaqqittariaqartoq innuttaasunut neqeroorutigisinnaajumallugu pikkorissunik paarsisoqarnissaq aamma meeqqerivinni meeqqanik ineriartortitsisinaanissaq.

Demokraatini isumaqarpugut anguniakkatta pingaarnersaat tassaasariaqartoq piffissaq qaninnerusoq isigalugu inuiaqatigiit perorsaasunik naammattunik peqalissasoq, maani nunami ilinniarsimasunik. Ersarissumik oqaatigalugu tamatumani pisariaqarpoq perorsaasunngorniartartut amerlineqarnissaat aamma perorsaasutut sulinerup pilerinarnerulersinnissaa.

Perorsaasunngorniartartut qassinik amerlineqassanersut pillugu apeqqutaavoq sukumiisumik misissuititsinissaq, kisianni allatut ajornartumik piffissami aalajangersimasumi perorsaasunik amerlanerusunik ilinniartitsisariaqarpugut meeqqerivinni sulisussat naammattut pigilissagutsigit. Aaqqiissutaasinnaavoq perorsaasunngorniarfimmik nutaamik pilersitsinissaq ilulissaniinnaangitsoq aammali illoqarfimmi allami perorsaasutut ilinniarsinnaanissaq qularnaarumallugu. Tamatumap amerlanerusut pilerittatsissinnaaqooqai.

Tamatumap saniatigut ersarilluinnarpoq perorsaasutut akissarsiat allanut atorfinnut naleqqiullugu pilerinartorsuunngitsut, qularnanngilarlu tamanna pissutaaqataasimassasoq perorsaasutut ilinniarumavallaartoqaanginneranut. Tassani iluarsiiissutaasinnaavoq akissarsiarissaarnerulersitsiniarnissaq ilinniartitsisutut peqqissaasutullu akissarsiat qanillattorlugit, perorsaasunngorniarusuttarnerup tunulliunneqartannginnissaa pillugu allanut ilinniakkanut assigusinnaasunut naleqqiullugu.

Demokraatinut pingaaruteqarluinnarpoq meeqqerivinni pissutsinik iluarsiinissaq sulisoqarneq, angajoqqaat minnerunngitsumillu meeqqat eqqarsaatigalugit.

Isumaqarpugut Kalaallit Nunaannut pitsaanerusumu aqqutissaasoq meeraaqqeriviit/meeqqeriviillu pitsaasut piginnaasaqarluartullu anguniarnissaat taamatullu perorsaasut. Ilinniarluarsimasunik sulisoqaraanni meeqqat sumiginnakkat paaspallanneqartalissapput pisariaqartitaannillu ikiorlugit. Meeraaqqerivinnimi - meeqqap inuunerata aallartiffiani - unitsitsisoqarsinnaavoq meeqqap inuunera aserorneqartinnaagu.

³ <http://www.npk.gl/Portals/0/NPK%20dokumenter/L%F8ntavle.pdf>

⁴ <http://sermitsiaq.ag/alamerende-mangel-paedagoger>



Isumaqarpugut meeqqeriviit pitsaassusaannik piginnaasaannillu qaffassaaneq kalaallit nunami allani najugaqalersimasut eqqarsaatigalugit Kalaallit Nunaat ornissallugu pilerinarnerulissasoq iluaqutissartaali annerpaaq tassaassaaq inunnik nukittuunik ilusilersueqataasinnaalernissarput sunissaminnut ilisimaarinnittunik aamma perortussanik imminnut naleqartinnerullutik imminnullu tatiginerullutik. Tamakku pisariaqartilluinnarpagut.

Qilanaarpugut partiit allat Naalakkersuisullu saqqummiussassaannut.